



Izveštaj sa 18. sjednice Općinskog vijeća Ilijaš

Dana, 29.04.2014. godine, u sali Općinskog vijeća Ilijaš održana 18. redovna sjednica Općinskog vijeća. Sjednica je prekinuta na devetoj tački Dnevnog reda. Nakon usvajanja Dnevnog reda, nešto drugačijeg od predloženog, vijećnici su postavljali pitanja i upućivali inicijative.

Na današnjoj sjednici Općinskog vijeća potrebnu većinu glasova dobio je prijedlog Odluke o utvrđivanju interesa za organizovanje i održavanje Manifestacije kulture, sporta i trgovine "Ilijaški dani", kao i Odluka o novčanim podrškama u poljoprivrednoj proizvodnji na području Općine Ilijaš za 2014. godinu, kojom se uređuje sistem novčanih podrški u primarnoj poljoprivrednoj proizvodnji na području općine Ilijaš za 2014. godinu i to: namjena podrški, izvor i visina novčanih podrški, korisnici novčanih podrški te uslovi za ostvarivanje prava na novčane podrške

Zbog iskazanog interesa poljoprivrednih proizvođača za nabavkom plastenika kao i mogućnosti implementacije putem nevladinih i drugih organizacija kroz investicijske projekte uvodi se podrška nabavke plastenika po modelu sufinansiranja, čime se omogućuje određenim kategorijama da se uključe u proizvodnju povrća sa ciljem obezbjeđenja proizvoda za vlastite potrebe kao i ostvarenja dodatnih prihoda prodajom viška proizvedenog povrća.

Podrške mogu ostvariti pravna i fizička lica koji su ostvarili poljoprivrednu proizvodnju - djelatnost na teritoriji općine Ilijaš a koji su upisani u Registar poljoprivrednih gazdinstava i Registar klijenata izdat od nadležne općinske Službe, a koji dostave dokumentaciju o ispunjavanju opštih i posebnih uslova.

Podnošenje zahtjeva počinje po isteku 7 dana od dana stupanja na snagu ove Odluke i traje do 30. 08. 2014. godine.

Zahtjevi za ostvarivanje prava za sve podrške podnose se na propisanim obrascima Službi za privredu i finansije i investicije općine Ilijaš.

Općinsko vijeće Ilijaš usvojilo je i Odluku o imenovanju člana Općinske izborne komisije, u koju se imenuje g. Senada Hadžimehmedagić. Predsjednik Komisije za izbor i imenovanja Općinskog vijeća Ilijaš g. Nedim Matoruga dao je detaljan izvještaj o predlaganju ove Odluke i konstatovao da je Odluka donešena u skladu sa Izbornim zakonom Bosne i Hercegovine, Uputstvom o utvrđivanju kvalifikacija, broja i imenovanju članova Općinske izborne komisije grada Mostara i Izborne komisije Brčko Distrikta te Statuta Općine Ilijaš. Na Konkurs se prijavilo šest kandidata od kojih su pet ispunjavali sve uslove.

Na šestoj tački Dnevnog reda našao se Izvještaj o poslovanju za 2013. godinu JKP "Vodostan" d.o.o. Ilijaš. Izvještaj je vijećnicima obrazložio direktor JKP "Vodostan" Ilijaš, g. Saudin Mešetović, koji je istakao da je: "evidentna potreba za većom količinom vode, vodovodna mreža se proširuje, stambena naselja su u gradnji, a na pomolu su i formiranja novih naselja (apartmanskih zona). Glavni vodni resurs grada Ilijaša je objektivno u situaciji da je pogođen klimatskim promjenama i time praktično nesiguran i nestabilan izvor vodosnadbijevanja posebno u ljetnom periodu. Prisutan je ozbiljan deficit vode u zemljištu. Navedene probleme prate i finansijski.

Da bi se sistem vodosnadbijevanja održao na optimalnom nivou neophodno je fokusirati se na provođenju mjera zaštite postojećeg resursa, održavati sistem vodosnadbijevanja sa ciljem smanjenja mrežnih gubitaka vode, raditi na izgradnji komunalne kulture i disciplini u potrošnji vode, poduzeti potrebne mjere na planu formiranja ekonomske cijene komunalne usluge sa ciljem obezbjeđenja ekonomske samoodrživosti sistema vodosnadbijevanja te raditi na planu kvalitetnijeg rješavanja otpadnih voda".

Vijećnik g. Besim Gljiva je prezentirao problem na vodovodu "Vrela", te postavio pitanje pripajanja ovog vodovoda JKP "Vodostan", jer se iz ovog vodovoda snadbijeva oko 500 domaćinstava pitkom vodom. Nakon kraće rasprave Izvještaj je dobio potrebnu većinu glasova.

U okviru redovne aprilske tačke Informacije u oblasti zdravstvene zaštite na području Općine Ilijaš

prisutnim se obratila dr. Sena Softić-Taljanović, direktorica Zavoda za hitnu medicinsku pomoć i istakla da će Zavod za hitnu medicinsku pomoć vrlo brzo potpisati Ugovor sa Zavodom zdravstvenog osiguranja za otvaranje 24- satnog radnog vremena Hitne pomoći za stanovnike Općine Ilijaš, Vogošća i Hadžići. Direktor OJ Dom zdravlja Ilijaš. prim.dr. Nijaz Šitković, također se obratio prisutnim, i izložio ukratko šta je urađeno u prethodnom periodu u Domu zdravlja Ilijaš, istakao je problem nedevojnog broja prijavljenih korisnika Ambulante porodične medicine u Mrakovu, pokrenut je postupak za nabavku RTG aparata.

G. Fikreta Salihović Rukovodilac Apoteke Ilijašu JU "Apoteke Sarajevo" je istakli da imaju i želje i ambicije otvoriti apoteku na području MZ Mrakovo i nadaju se da bi tim privukli znatan broj pacijenata da koriste usluge porodične medicine u Ambulanti Mrakovo.

Na posljednjoj tački našao se Izvještaj o provođenju Izbora u MZ i Odluka o dodjeli mandata. Nakon duže rasprave sjednica je prekinuta na ovoj tački sa zaključkom kojim je naloženo Komisiji za provođenje izbora u mjesnim zajednicama da u roku od 7 dana izvrši ponovno brojanje glasačkih listića u MZ Ilijaš-grad i MZ Kamenica u prisustvu spornih kandidata i njihovih posmatrača.

O nastavku sjednice javnost će biti naknadno obaviještena.

Ul. 126. ilijaške brigade br. 6, 71380 Ilijaš
Tel. ++387 33 580-620, 580-690, fax. 400-505,
Transakcijski račun kod VAKUFSKE BANKE,d.d. Sarajevo:160200000710645
e-mail o_ilijas@bih.net.ba



Broj certifikata:209388